

Inzko: BiH vlast treba budžetski pomoći ekipiranju Tužiteljstva BiH



Visoki predstavnik i specijalni predstavnik Valentin Inzko posjetio je danas Tužiteljstvo Bosne i Hercegovine i sastao se sa glavnim tužiteljem Miloradom Barašinom. Tom prilikom je izrazio punu podršku radu ove institucije i naznačio spremnost da se od strane međunarodne zajednice pruži daljnja pomoć radu i razvoju ove institucije.

Visoki predstavnik i specijalni predstavnik EU podržao je stav glavnog tužitelja da nadležne pravosudne institucije zajedno s Vijećem ministara BiH, koje odlučuje o njihovom budžetu, izvrše transformaciju Državnog tužiteljstva u smislu obezbjeđivanja potrebnih preduvjeta za zapošljavanje adekvatnog broja domaćih tužitelja koji će nastaviti rad i na taj način osigurati kontinuitet rada institucije.

Međunarodna zajednica će i dalje pomagati finansiranjem i stručnim znanjem te tako nastaviti podržavati Sud i Tužiteljstvo BiH, između ostalog i tako što će pojačati postojeće međunarodno savjetodavno prisustvo u Posebnom odjeljenju za organizirani kriminal.

Visoki predstavnik i specijalni predstavnik je ponovio uvjerenje međunarodne zajednice da je potrebno da pravosudne vlasti BiH preuzmu punu odgovornost za rad pravosuđa.

Vladavina zakona ostaje ključni kriterij za proces integracije u EU. BiH bi trebala pojačati napore u oblasti pravosudne reforme te borbe protiv organiziranog kriminala i korupcije.